

Cas di Cultura lo tembla dianan 2, 3, 4 di Mei venidero cu e obra teatral humoristico: "E amor di Dorita"



Dianan 2, 3 y 4 di Mei 2015 pa 8 pm en punto lo tuma lugar den Cas di Cultura presentacion di e obra teatral: E Amor di Dorita. E Amor di Dorita ta un obra teatral original skirbi y dirigi pa Lilia Luidens. E obra ta basa riba hechonan real den e Aruba di añanan '50. Nos ta bay den e mundo di e campista, unda no tabata tin awa ni coriente. Unda cu e homber ta cabez di cas y ta tuma tur decision. Unda cu e machismo ta resalta y e hende muher mester tuma. Pero ta yega e dia unda cu muhernan ta lanta pa nan derecho. E acionnan ta tuma lugar den cas di famia Malbat. Un famia humilde cu ta consisti di tata, mama, yiu muher y Dudu, kende no a cay riba su boca. "No ta cos di perde, shonnan". Den e obra tin cantamento y tocamento en bibo.

E elenco ta consisti di un conhunto di artista bao di e nomber: Sabor Crioyo. Lo tin actuacion di Rachel Kraayvanger, Richard Dabian, Raymond Kamperveen, Onty Lopez, Ada Luidens y Maria Caster, kendenan tin amplio experencia den canto y/of teatro. Actornan manera Diana Marchena, Frido Werleman, Jair Wever, Rachelle Croes-Caster y Marijke Croes-Luidens lo haci nan debut. E obra aki ta demostra con por trece teatro den forma humoristico casi sin haci uso di palabranan menos bunita. E Papiamento crioyo ta

trece bek palabranan di antes cu ta bayendo perdi. Tambe tin dicho y proverbio na Papiamento pa demostra e generacion nobo cu nos Papiamento ta rico na palabra y cu no tin nodo di haci uso di palabranan stranhero pa por comunica. Pues e obra ta un gran enrikecimento pa nos dushi Papiamento. E obra tin un duracion di mas o menos 2 ora y mey. "E Amor di Dorita" a wordo presenta na 1987 cu Grupo di Bionic Korfball Club. E tabata un exito rotundo cu como 7 sala completamente yen. Pesey e grupo ta bin cune un biaha mas, despues di 28 aña, pa pone Aruba tembla di hari.

Den e curriculum vitea di e escritora tin entre otro obranan cu a haci impacto manera:

Na 1981: Chibi den susto, E obra a bay cu e premio di e obra mas original den Festival di Teatro Infantil.

Na 1982: Un Aventura especial cu a bay cu e premio di e obra mihor presenta den Festival e aña ey. Na 1992: Mijn Identiteit a wordo presenta pa su mahestad La Reina Beatrix. Na 1996 a presenta e obra musical Magia di Fantasia dedica na Maybeline Arends-Croes. Pues sigura bo mes di un lugar den sala di Cas di Cultura riba dia 2,3 y/of 4 di Mei 2015 pa e funcionnan. Nos lo start pa 8'or di anochi en punto y entrada lo ta Fl 30,- pa persona. Kaarchi ta obtenibel na Valero Santa



Cruz, Valero Caya Grandi, Cantine di D.O.W. na Wayaca, Cast & Crew di E Amor di Dorita y na Cas di Cultura e anochinan di presentacion. Pa mas informacion bishita nos facebook page "E Amor di Dorita" of yama 5637758 of 5655880.

